

Zahr ka Toṛ

Mūsā aur Pītal kā Sānp



zahr ka tor. mūsā aur pītal ka sāñp

The Antidote. Moses and the Bronze Snake

by Bakhtullah

[*Zinda Kalam 11*]

(Urdu—Roman script)

© 2026 Chashma Media.
published and printed by
GWCS, New Delhi

Bible text is from UGV.

illus. R. Gunther
<https://www.freebibleimages.org/illustrations/rg-moses-snake/>

for enquiries or to request more copies:
askandanswer786@gmail.com

Fahrist

Tauret, Gintī 21:4-9

8



Misr se nikalkar Isrāīliyoñ ke lie īmān kā safr shurū huā. Wuh Sīnā Pahār par pahuñch gae jahāñ unheñ Ḳhudā kī rāh bataī gaī. Wahāñ unheñ sikhnā parā ki Ḳhudā wafādārī chāhtā hai. Is ke bād wuh registān meñ ghūmte rahe. Itne ghūmte rahe ki be-sabr ho gae. Tab wuh Ḳhudā aur Mūsā ke ḵhilāf bāteñ karne lage,

Āp hameñ Misr se nikālkar registān meñ marne ke lie kyoñ le āe haiñ? Yahāñ na roṭī dastyāb hai na pānī. Hameñ is ghaṭiyā qism kī ḵhurāk se ghin ātī hai.



Tab Rab ne un ke darmiyān zahrīle sānp bhej die jin ke kāṭne se bahut-se log mar gae.





Phir wuh Mūsā ke pās āe. Unhoñ ne kahā,

Ham ne Rab aur āp ke ḵhilāf bāteñ karte
hue gunāh kiyā. Hamārī sifārish karen ki
Rab ham se sāñp dūr kar de.



Mūsā ne un ke lie duā kī to Ḳhudā ne farmāyā,

Ek sāñp banākar use khanbe se laṭkā de.
Jo bhī ḍasā gayā ho wuh use dekhkar
bach jāegā.



Is par Mūsā ne pītal kā ek sāñp banāyā aur khañbā kharā karke sāñp ko us se laṭkā diyā. Aur aisā huā ki jise bhī ḍasā gayā thā wuh pītal ke sāñp par nazar karke bach gayā.

Sadiyon bād Īsā Masīh ne is wāqiye kā zikr karke farmāyā,

Jis tarah Mūsā ne registān mein sāñp ko lakaṛī par laṭkākar ūñchā kar diyā usī tarah zarūr hai ki Ibn-e-Ādam ko bhī ūñche par chaṛhāyā jāe, tāki har ek ko jo us par īmān lāegā abadi zindagī mil jāe.
(Injīl, Yūhannā 3:14-15)

► *Ibn-e-Ādam kaun thā?*

Īsā Masīh Ibn-e-Ādam thā.

► *Kyā zarūr thā?*

Zarūr thā ki Ibn-e-Ādam ko bhī ūñche par charḥāyā jāe.

► *Īsā Masīh ko kis tarah ūñche par charḥāyā jāegā?*

Use salīb par charḥāyā jāegā.

► *Kyā Īsā Masīh is salībī maut se bachnā chāhtā thā?*

Nahīn. Us ne khud farmāyā ki zarūr hai ki Ibn-e-Ādam ko charḥāyā jāe.

► *Yih kyon zarūr thā?*

Yih islie zarūr thā ki har ek jo us par imān lāe abadī zindagī mil jāe.

► *Īsā Masīh kis tarah khañbe par laṭke sāñp kī māñind hai?*

Jis Isrāīlī ne registān mein khañbe par laṭke sāñp par nazar gaṛāe rakhī wuh sāñpon ke zahr se bach gayā. Īsā Masīh ko bhī khañbe par laṭkāyā gayā. Jo Īsā Masīh par nazar gaṛāe rakhtā hai wuh gunāh ke zahr se bachkar abadī zindagī pātā hai.



- *Insān ko Īsā Masīh par nazar gaṛāe rakhne se kis tarah abadī zindagī mil jātī hai?*

Apnī salībī maut se Īsā Masīh ne hamārī khātir apnī jān dī. Jo sazā hameñ milnī thī wuh us ne bardāsht kī. Ab jo us par nazar gaṛāe rakhe us kā Ḳhudā se rishtā bandh jātā hai, wuh Ḳhudā ke khāndān kā fard ban jātā hai. Tab us ke gunāhoñ ko māf kiya jātā hai, aur wuh abadī zindagī pātā hai.

- *Kyā registān meñ tamām Isrāīlī sāñpoñ se bach gae?*

Nahīn.

- *Kyon nahīn?*

Sirf wuh bach gae jinhoñ ne sāñp par nazar kī.

- *Kyā sab ko Īsā Masīh se najāt miltī hai?*
Nahīn. Sirf wuh bachkar abadī zindagī pāte haiñ jo Īsā Masīh par nazar gaṛāe rakhte haiñ.
- *Kyā āp gunāh ke zahr se bach gae haiñ? Kyā āp Ḳhudā ke ḵhāndān ke fard ban gae haiñ? Kyā āp ko abadī zindagī hāsil hai?*



Tauret, Gintī 21:4-9

Hor pahār se rawānā hokar wuh Bahr-e-Qulzum kī taraf chal die tāki Adom ke mulk meñ se guzarnā na paṛe. Lekin chalte chalte log besabr ho gae. Wuh Rab aur Mūsā ke ḵhilāf bāteñ karne lage, “Āp hameñ Misr se nikālkar registān meñ marne ke lie kyon le āe haiñ? Yahāñ na roṭī dastyāb hai na pānī. Hameñ is ghaṭiyā qism kī ḵhurāk se ghin ātī hai.”

Tab Rab ne un ke darmiyān zahrīle sāñp bhej die jin ke kāṭne se bahut-se log mar gae. Phir log Mūsā ke pās āe. Unhoñ ne kahā, “Ham ne Rab aur āp ke ḵhilāf bāteñ karte hue gunāh kiyā. Hamārī sifārish karen ki Rab ham se sāñp dūr kar de.”

Mūsā ne un ke lie duā kī to Rab ne Mūsā se kahā, “Ek sāñp banākar use khañbe se laṭkā de. Jo bhī ḍasā gayā ho wuh use dekhkar bach jāegā.” Chunāñche Mūsā ne pītal kā ek sāñp banāyā aur khañbā kharā karke sāñp ko us se laṭkā diyā. Aur aisā huā ki jise bhī ḍasā gayā thā wuh pītal ke sāñp par nazar karke bach gayā.